

V
SALVTAREM
VERTICATIONIS
IN DIVERSIS MORBIS VSVM



PRAESIDE

PETRO IMMANVELE HARTMANNO,

PHIL. ET MED. DOCT. PATHOLOG. THERAP. CHEM. ET MATER. MED. PROF.

PVBL. ORDIN. ACAD. CAESAR. NAT. CVR. ET ELECTOR. MOGVNT. ER-

FVRT. SCIENT. VTIL. ITEMQVE SOCIETAT. BEROLINENS. NATVR.

SCRVTATOR. ET DVCAL. TEVTON. HELMSTAD. SODALE, ORDINIS

MEDICI H. T. PRODECANO

D. MAII CIOICCLXXXIX.

MEDICI DOCTORIS DIGNITATEM


LEGITIME CAPESSVRVS

ALIQVOT EXEMPLIS

ILLVSTRAT

CAROLVS HENRICVS SCHLENKER

SVIDNICENSIS SILESIVS.



TRAIECTI AD VIADRVVM,
E TYPOGRAPHEO APITZIANO.

7046/P



PROOEMIUM.

Equidem non dubito, quin ex eorum numero, qui in veterum medicorum, Graecorum Romanorumque, monumentis sunt versati, pauci inueniantur, qui, quam efficacibus aequae, ac salutaribus medendi methodis magni isti viri in diuersis grauioribus morbis sint vsi, penitus ignorent. Verum enim vero licet de ipso huius modi antiquissimorum remediorum vsu, effectuque praestantissimo, nullum sit dubium: tamen, quo modo, et quasnam ad rationes, quibusque miscelis sint applicata, plerumque ignoratur. *Elleborismorum*, verbi causa, summa olim in tollendis grauissimis morbis fuit auctoritas

et sollemnis vsus: sed, quodnam singulare hellebororum genus, qui applicationis modus, quaenam dosis, et cetera, huic inseruierint vsui, nec dum est expeditum; licet perspicacissimus harum rerum arbiter, IOANNES HENRICVS SCHVLZIVS*), in illustranda hac efficacissima medendi ratione subtiliter, vt solebat, docteque laboraret. Magnum porro olim aduersus magnos morbos in antiquissimis medicorum scholis remedium fuit *ψαμμις*: eiusdem tamen nostris temporibus adeo obscura est memoria, vt, praeter nomen, nihil aliud superfit. Atque huius generis plurima habemus exempla. Sed medica veterum *urticatio*, quippe simplex facilisque operatio, inde ab antiquissima aetate ad nostram memoriam peruenit; digna omnino, quae etiamnunc haud exauetoretur. Sollemne igitur profectum meorum specimen editurus, ad hanc materiem pertractandam animum adieci.

*) In *dissert.* Halae, anno 1717. edit.

§. I.

Epispastica quatenus?

Accidit in hominum corporibus haud raro, ut aut varii eorundem humores naturales, siue propriae adhuc atque a natura humana constitutae mixtionis tenaces, siue variis corruptis particulis sint inquinati, cum in priuatis suis canalibus aut conceptaculis iusto magis augeantur accumulenturque, tum ad alias partes, quae alius generis humoribus sunt destinatae, delabantur, illicque sedem figant; aut ipsae solidae fibrae, partim musculares, irritabili facultate praeditae, partim nervosae, sentiendi vi pollentes, utriusque virtutis mox augmentum, mox decrementum, variis ex causis patiantur. Quandocunque haec fiunt, et diuersos multiplicis omnino generis morbos generant, tum profecto medentium interest: mox humores vitiosa ratione singulatim ad sua priua aut aliena loca congestos dissipare, et aequabili proportionem distribuere, aut ad congrua humani corporis cola deriuare; mox ante dictas irritabiles sentientesque fibrillas, si vi sua defecerint, idoneo irritamento excitare, aut, si forte ab indigeno et priuatim incumbente stimulo peculiariter tactae, vel nimium sentiant doleantque, vel in vehementiores motus contractiles cieantur, denuo, amoto et ad loca, nec irritabilia, nec sentientia, aut etiam emunctoria, depulso sti-
A 3 mulo,

mulo, in liberam actionem vindicare. Quod si haec indicatio qualiscunque medica absoluitur per corpora, cuti applicata, quae particulis suis acribus atque stimulantibus epidermidem penetrant, et vascula cutanea tenerrima efficaciter irritant, donec maior in iisdem transfluentium humorum sequatur adfluxus, immo saepius ipsae hinc vesiculae excitentur; aut istos fines neruorum papillares, qui in cute desinunt, acriter stimulant, totumque exinde neruorum systema, et hoc parario quoque vniuersam muscularium fibrarum compagem, irritamento suo erigunt, insistantque vtrique generi actuosam firmant vim potentiamque: tunc haec *methodus* dicitur *epispastica*; ipsa quoque medicamenta externa, quae huic generi subsunt, epispastica nominari solent *a*). Verum enim vero modus genusque horum irritamentorum, huic vsui inferuentium, est duplex: aut *mechanicum*, si solo attactu aut impulsu externae horum corporum superficiei inaequalis, acutae, et rel. stimulus inferitur; aut *salinum*, si particulae salinae acres varia ratione extrinsecus cuti admouentur, ab osculis venosis cutaneis sorbentur, adeoque confinium minimarum arteriolarum oscillationes excitant.

§. II.

Urticatio qualis et quaenam operatio?

Urticis recentibus aegrotos, quorum vires vario modo effoetae deprehenduntur, caedere, non
adeo

a) Ab ἐπισπάω, attraho.

adeo infrequens veterum medicorum fuit consuetudo; sicuti ex iis, quae supersunt, eorundem monumentis luculenter constat. Ex quibus etiam intelligi potest, nec inefficacem, nec infructuosam fuisse hanc medicinam. Colligam potiora hac de re veterum medicorum testimonia, his dictis fidem factura. Antiquissimum omnium, qui huius vrticationis medicae mentionem fecerunt, inuenio auctorem, A. CORNEL. CELSUM. Non, quod hoc a viro hanc operationem primum institutam existimem; vrticarum enim vrens, adeoque etiam epispastica, efficacitas in vulgus erat nota: sed quod in iis, qui ad nos peruenerunt, libris, quantum memini, vrticatio medica a CELSO primum memoratur. Hic enim, neruorum resolutioni medendi rationes exponens: *Prodest, ait b), torpentis membri summam cutem exasperasse, vel vrticis caesam, vel imposito sinapi, sic, ut, ubi rubere coeperit corpus, haec remoueantur.* CELSO aetate proximus, ARETAEVS Cappadox, ad excitandos ex profundis soporibus lethargicos haec commendat: *Materia, scribens c), esto calefaciens, et ex adiectione mordens. Nam utroque vernosis opus est ad calorem excitandum atque vigiliam. Primum igitur vrtica crura verberato; tenuissimae namque vrticae partes adhaerentes non diu perseuerant, sed pruritum et dolorem non grauem inferunt: mediocriter vero stimulant et tumefaciunt, et calorem excitant. Ex quo ARETAEI loco tam applica-*

b) De medic. Libr. III. cap. 27. pag. 179. edit. Krausf.

c) In Curat. acut. Libr. I. cap. 2. pag. 80. edit. Boerhaav.

plicationis ratio, quam medentis scopus clarissime intelligi potest. Reliqui veteres medici Graeci Romanique, nisi me memoria fallit, huius rei, forte tanquam peruulgatissimae, mentionem prorsus intermiserunt. Recentiorum vero temporum scriptores, quos deinde congruo loco excitabimus, huius vrticationis memoriam passim renouarunt.

§. III.

Vrticae vrticationi idoneae.

Sed scire refert, quaenam potissimum ex vrticarum genere huic medentium scopo sint opportuna? Haud difficilis est coniectura, non alias olim huic vsui inseruisse vrticas, quam istas, quarum folia, dum recentia sunt atque succosa, attactu suo cuti vstionis pruritusque sensum imprimunt, et contacta loca in latas planasque papulas vesiculasque, potissimum albicantes, et mox iterum fugaces atque euanescentes, eleuant. Hoc nomine allegari merentur *vrtica dioica* LINN. siue *vrtica vrens maxima* CASP. BAVHINI; *vrtica vrens* LINN. siue *vrtica vrens minor* C. B. et *vrtica pilulifera* LINN. siue *vrtica vrens, pilulas ferens*, C. B. Superuacanei fore laboris existimo, si singulares harum vrticarum characteres botanicos eruere vellem: cum non solum peruulgatissimae, neminique ignotae sint plantae; verum etiam a veteribus scriptoribus botanicis, verbi causa, THEOPHRASTO *Eresio*, DIOSCORIDE *Anazarbeo*, PLINIOQUE adeo accurate descriptae, vt dubitari ne-

nequeat, quin nostrae, quarum hodiernus usus est, cum iisdem, quas isti viri recensuerunt, plane sint eadem. Quid? quod si etiam hac super re lis nobis intenderetur, nihil profecto intererit. Qualescunque enim putes vrticas, a veteribus adhibitas, tales certe admittere te oportet, quae extrinsecus vrendi pungendive pollent efficacitate, et hinc inter epispastica suo merito locum inuenerunt.

§. IV.

Fons huius irritamenti.

Vt autem, quinam fons sit huius irritamenti, quod ante dictae vrticae vrentes cuti inferuut, distincte intelligatur, ad ipsa harum plantarum folia, quibus potissimum haec vis insidet, examinanda animum aduerti oportet. Haec nimirum folia vtraque superficie, inferiori tamen paulo parcius, pilis siue aculeis rigidis et pellucidis muniuntur, qui vbique folis horum foliorum venis velut infixi ipso nudo oculo conspiciuntur, nec alibi vnquam exstant. Quilibet huius modi pilus, satis armato oculo conspectus, subulatus apparet, in cuspidem acutissimam et quasi rigidam desinens, versus radicem vero, qua ex folii vena prodit, in bulbillum aut potius vesiculam oblongam, pellucidam, limpidi succo plenam, expans-

sus. Haec in recentibus vrticis *d*). Quam primum autem ficcatae sunt vrticae, persistunt quidem iidem aculei, haud minus, ac antea, rigidi, sed parum adhuc pellucidi, collapsa simul inferiori vesicula, pristinoque liquore destituta. Vnde nata est, haud improbabilis omnino, coniectura, succum istum recentis herbae esse acrem causticumque, et stimuli vrentis fontem *e*). Quo nomine irritamentum hoc foret *salinum* (§. I.). Alii contra acutissimam illam aculeorum cuspidem sub attactu cuti infigi, diffractamque illic relinqui, adeoque vnice hinc cutim *mechanico* stimulo irritari, contendunt *f*).

§. V.

Nostrae hac super re obseruationes.

Vt autem in difficili hac atque spinosa quaestione, quae vtrunque suis munitur argumentis, ipsi periculum faceremus, eruendi, vtra priorum sententiarum (§. IV.) a vero propius absit, sequentia instituius examina, microscopio quodam *Lieberkühniano*, curatissime confecto, oculum armantes.

Primo

d) Confer HOOKE'S *Discoveries by the microscope*, pag. 22. tab. 12. et BONANNI *Micrograph. curios.* pag. 75. fig. 75.

e) HOOKE *loc. cit.* GVETTARD in *Memoir. de l'Acad. de Scienc. de Paris* ann. 1751. pag. 350. et VALISNERI *Oper.* Tom. III. pag. 204.

f) BONANNI *loc. cit.* et illustris MURRAY in *Apparat. medicamin.* Volum. IV. pag. 591.

Primo intuiti fumus in vrtica dioica, terrae adhuc innascente, definiti et notati folii pilos, vtraque in superficie, eosdemque prorsus sui similes, talesque inuenimus, quales paulo ante sunt descripti. Iisdem porro pilis caute, vt vix et sine impulsu tangerentur, admouimus manum; protinus vitionis sensus cum subsequente papula pruriente est ortus. Hunc ipsum locum adfectum dein statim microscopii ope inspeximus, nec ibidem vllum vulnuscule aut aculei inhaerentis vestigium deprehendimus: sola porulorum cutaneorum oscula circumcirca paulo altius turgebant, ac in vicinis locis non ab vrtica tactis. Tum etiam, eodem fere temporis momento, in eosdem aculeos, antea inspectos, deinceps a manu tactos, oculum intendimus armatum: aculei reliquis longiores vesiculam habebant nunc minus pellucidam, limpido paene vacuam latice, et nonnihil collapsam; apice in plerisque iam dehiscente. Elapsa circiter quarta horae parte iterum repleta est haec vesicula, conuiuente simul apice. Tum eodem in loco repetitum experimentum eadem quoque obtulit phaenomena. In decerpto vrticae recentis folio, post primum attactum vrendi vis statim minor est obseruata, nec microscopium denuo repletam aculei vesiculam, nec conuiuentem apicem indaganti oculo ostendit. In ficcata denique hac planta bulbillos istos pilorum contractos, nulloque liquore impletos, animaduertimus. Ex his omnibus igitur coniunctim sumtis colligimus, partim inesse saltem istorum aculeorum apicibus ve-

getabilem illam sentiendi facultatem, vnde ab attactu velut resiliunt et dehiscunt; quam etiam, verbi causa, in *impatiensibus*, *mimosi*, aliisque deprehendi, constat: partim excuti expellique hoc motu liquorem in aculei bulbillo collectum, sorberique adeo statim ab osculis pororum cutaneorum. Acri autem materie salina hunc laticem scatere, ipse stimulus satis abunde declarat.

§. VI.

Vsus vrticationis medicus.

Ex iis, quae haecenus disputauimus, obscurum esse non potest, vrticationem summo suo merito haud infimum in epispasticorum classe mereri locum, omnesque istos ab eiusdem applicatione, conuenienter repetita, expectari posse effectus, quorum gratia rubefacientia adhibentur. Proinde quotiescunque imminutio aut defectio sensibilitatis aut irritabilitatis in aegroto quodam adest, aut congesti alicubi boni malique humores aliorum sunt auocandi, toties haud inopportuna efficacitatis erit vrticatio. Eo igitur consilio, vt supra (§. II.) notauimus, paralyti CELSVS, lethargo ARETAEVUS, vrticationem opposuit. Hinc etiam libidinosae veterum Graecorum Romanorumque artes vrticarum vsum, ad torpentis Veneris excitationem, inter flagra aphrodisiaca retulerunt; sicut IUVENALIS et PETRONIVS innuere videntur.

videntur g): quocum etiam consentit MENGIVS
 BLANCHELLVS, *Faentinus h)*; a quo haec operatio
 sterilitatis remedium vocatur. Praeter haec quoque,
 quantum in paralyfi et soporibus morbofis prae-
 stiterit vrticatio, nuperiora exstant exempla. Plura
 huius generis de discussio sopore febrili aegrotantium,
 ad brachia, femora, atque crura, vrticis caesorum,
 recensuit HOMOBONVS PISO i). Brachium puellae
 paralyticum in motus sensusque integritatem ab ad-
 hibita vrticatione restitutum vidit illustris IOANNES
 ANTONIVS SCOPOLI k). Aliud eiusdem salutaris
 euentus exemplum legi in *commentariis acad. scient.*
Parisiens. perhibetur a viris celeberrimis, RVDOL-
 PHO AVGVSTINO VOGELIO ET HENRICO IOAN-
 NE NEPOMVCENO CRANTZIO l). Sed, ne nimius
 sim, omitto cetera, et progredior ad illa, quae ipse
 obseruando cognoui, exempla, fidem plagosae huius
 medicinae confirmatura.

B 3

§. VII.

g) Prior Satyr. XI. vers. 162. seq. posterior in Satyrico, pag. 64. edit.
Lotichian. quem ad locum conferri meretur eiusdem *Commentar.*
perpetuus, pag. 308.

h) Citatus ab illustri MURRAY loc. allegat.

i) In *Spicilegio curation.* pag. 6. seq.

k) In *Flora Carniol.* edit. I. pag. 428.

l) Meae tamen fidei est, non dissimulare, ab utroque viro *allege-*
rum locum in ipsis *Commentariis*, a me euolutis, nihil hac de re
 complecti.

§. VII.

Speciatim in exanthematibus.

Ex his a me obseruatis recensebo primum insignem urticationis in exanthematum eruptione ad certa quaedam loca dirigenda efficacitatem: quam partim fortuitus casus, partim medentis intentio, priori casu excitata, comprobauit. Vir illustris huiusque academiae quondam Ictus longe celeberrimus filiarum suarum educationem commiserat feminae cuidam Gallicae, patriam hanc linguam optime quidem callenti, ceteroquin autem aniculae morosae, difficili atque iracundae. Forte fortuna accidit, ut filiarum minima, quinquennis, vna cum ista paedagoga in horto ambulare iuberetur. Illa prior, de crurum dolore atque torpore quæstæ, reuinit deambulationis consortium, grauitèr illacrymans: hæc vero, statim in iram coniecta, et dissimulatam segnitiam suspicata, fasciculos urticarum, prope nascentium, subito decerpit, et, leuata puellæ tunica, innocentes eiusdem nates atque femora hac virga egregie caedit. Variolæ isto tempore late hanc per urbem vagabantur. Vix aliquot horis post has immeritas plagas puellæ febrile incipit, alteroque iam die maculae variolosae confertim in natibus femoribusque erumpunt, toto reliquo corpore prorsus intacto. Natae hinc deinde pustulae confluentes, superato morbo, in natibus quidem per innumerabiles cicatrices sui vestigium reliquerunt, non corrupta vniuersi

uerſi reliqui corporis venuſtate. Hem! quam excellens huic puellae ab vrticatione dos acceſſit! Hoc exemplo edoctus, aliis quoque virginibus feminisque, ſuae formae curioſis, ſi forte varia puſtularum vlcuſculorumque chronicorum genera faciem et proxima loca occupauerint, vrticationem dorſi frequentius repetendam, non ſine laetabili ſucceſſu, commendauit. Abſint modo ſiphylitica inquinamenta.

§. VIII.

Porro in rheumatismis fixis.

Quantum moleſtiae ſaepe numero medicis adferant, eorundemque patientiam fatigent dolores rheumatici chronici, et in vno eodemque corporis loco velut infixi, tot, et medentium, et aegrotantium, querelis locupletiffime conſtat. Ab inſtituto ergo noſtro non erit alienum, duo hic commemorare aegrorum, diu rheumatismo peſſime vexatorum, exempla, quos poſt multiplicia alia conamina medica plane irrita, vrticatio tandem non alleuauit modo, ſed etiam perfecte ſanauit. Vir litteratus, duo ſupra quadraginta annos natus, temperamenti choleric, habitusque corporis paullo gracilioris ſicciorisque, ceteroquin ſatis bona valetudine uſus, poſt lucubrationes in ſeram noctem protractas, et duarum hebdomadum ſpatio, tempeſtate auctumnali, continuatas, incidit tandem in lumbaginem rheumaticam grauiffime dolentem, adeo, vt vix, niſi incuruato

uato tergo, incedere posset, multasque noctes insomnes transigeret. Quibus cruciatibus, raro parum remittentibus, opposuit et doctissimorum medicorum consilia, et varias medendi rationes: sed supra semestre omnia in cassum. Tandem medici, quem postremo in consilium vocauerat, iussu, bis terue per singulos dies, vrticis caedendos sibi curauit lumbos, illo ipso loco, qui maxime doleret. Vix ita transactis decem diebus exacerbatio rheumatici doloris nocturna mirum in modum remisit, noctesque redditae sunt longe quietiores. Continuata porro in tertiam hebdomadem vrticatione cessit penitus rebellis lumbago, erectumque aegri incessum non amplius interrupit. Eodem exemplo excitata et confirmata ipsius huius aegri soror, quae saepe redeuntes acerbissimos sub dextra scapula dolores rheumaticos passa erat, vltro vexato loco per aliquot dies vrticationem applicuit, praesentissimo effectum, quandocunque rheumatismus reditum minaretur. Rariores etiam hinc atque infrequentiores factae sunt familiaris huius mali accessiones.

§. IX.

Itemque in neruorum resolutione.

Postremo, lectorum venia, adiiciam memorabile quoddam exemplum istiusmodi morbi, aduersus quem iam ab antiquissimis temporibus apud medicos magna fuit vrticationis existimatio atque com-

commendatio. Paralyticos enim vrticis caedi esse iustos, ex ante disputatis abunde constat. Quantum hac via neruorum fibrarumque motricium inertiae obuiam eatur, sequens docet exemplum. Vir quidam quinquagenarius, verbi diuini in aliquot pagis vicini circuli Neomarchici Sternbergensis praeco, dum mense Februario, ante sedecim circiter annos, ex altero pago, in quo sacra administrauerat, mane hora octaua, turbido ac immiti coelo, domum redit, subito apoplexia corripitur, celerrimam mortem minante. Ab aduocato protinus vicini oppidi, *Schwibusii*, chirurgus, et aliquot horis post medico quoque, in vicina Polonia medicinam faciente, collata adeo feliciter sunt consilia, vt apoplexiae insultus discuteretur, tertioque die aeger denuo sibi constaret, et functiones superiorum corporis partium rectissime se haberent. Sed in femoribus cruribusque remansit tam enormis sensus motusque muscularis abolitio, vt aeger pedibus velut pendulis neutiquam insistere posset. Tanta ergo neruorum resolutioni tollendae plurimi, et inter hos haud pauci magnae celebritatis, medici, ab aegro consulti, saluberrima consilia contulerunt. Quatenam remedia, quot aciculae, quot balnea, et sexcenta alia in atrocissimo hoc morbo sint proposita, nec satis scio, nec, si scirem, singulorum recensionem instituto meo congruam existimo. Satis erit, hic annotari, integro biennio, omnium medicorum, qui suis consiliis aegro prospexerunt, opera vix tantum esse effectum,

ut quantuluscunque in vexata a paralyfi loca rediret sensus, mouendi tamen facultate semper intercepta. Tandem alius medici adhortatione monitis commotusque aeger, lectis simul CELSI atque ARETAEI, quos supra excitauimus locis, vrticationis periculum facere, apud animum statuit. Ergo quotidie ter quaterque ab vxore caedi sibi vrticarum fasciculis voluit nates, lumbos, femora, atque crura: quae etiam non sine multis super huius medelae seueritate effusis lacrymis hoc officio est perfuncta. Exeunte primo ab incepta hac medicatione mense excitata est acrior sentiendi facultas; sub alterius mensis finem nonnihil moueri coeperunt pedum digiti, et sic sensim, nullo die intermissa hac operatione, rediit adfectis et debilitatis partibus mouendi potentia pristinumque musculorum robur. Sic per quinque menses bene, licet acerbe, vapulans aeger prorsus in sanitatem restitutus est: ut per haec luculenter est declaratum, quod non modo solus, sine adminiculo, expedite incedere poterat, sed etiam, nondum hinc exacto anno, ex vxore, in tot profusarum lacrymarum compensationem, filiolum suscipiebat.

§. X.

Scholion.

Hem! quanta foret generis humani felicitas, si ii quoque seuera vrticatione haud infructuose tra-

tractari possent, qui dissolutis sunt moribus, et quibus mens corrupta ad quascunque saluberrimas monitiones quasi hebet, ingeniique velut nerui torpentes virtutum stimulis nullo modo denuo excitari possunt. Ne in huius farinae hominibus de vrticationis efficacitate plane desperemus! Sequamur potius optimum praestantissimumque consilium magni olim perspicacissimique inter Anglos philosophi, dicentis :

Fiat experimentum!

BACO VERVLAMIVS.



